

Ken ta MARIO "Aiky CROES"?

Aki ta sigui un relato en cuanto e persona di Aiky Croes, na kende e festival di dande (2003) e aña aki ta wordo dedica.

Aiky a nace di un famia humilde dia 12 Juli 1940 (63) na Santa Cruz. E tata di Aiky, "Francisco "Panchico" Croes hunto cu e mama di Aiky, Mimita Croes a cria un total di 13 ruman.

Ya for di un edad di 14 aña, Aiky a cuminza ta pasa e paranda di aña nobo den Santa Cruz. Acompaña pa su amigonan di infancia cu ta entre otro: Sr. Shon Pa Lopez, Benedicto Lopez, Theolindo Lopez, Cobi Koolman, Betty Albertz, Mario y Frans Croes, Aiky tawata pasa cas pa cas, anto na pia.

Aiky semper tawata gusta toca su tambora, aunque e tawata yuda cu e wiri ora cu tin mester. Sinembargo no a dura mucho cu su conhunto di infancia ta spat for di otro pa motibo cu mayoria di e integrantenan a bay studia den exterior. Despues di esey Aiky tabata forma parti di e paranda di fin di aña di su omo Sr. Hemmy Croes (q.e.p.d.)

Akinan atrobe Aiky ta haya e tarea di tamborero y hunto cu entro otro su tata Francisco, su omo Hemmy, Sr. Deshi y Juchi Croes (q.e.p.d.) y e cantantenan di Dande Sr. Chimi Croes y Belin Maduro (q.e.p.d.) Aiky tawata brinda famia y conocirnan cu e traditional Dande.

Sinembargo e agrupacion aki tampoco ta dura hopi pa motibo cu e alma di e conhunto Sr. Hemmy Croes a bay biba na Corsow.

A dura te cu aña 1959 cu e ruman di Aiky esta Sr. Betico Croes ta regresa for di Hulanda y mesora Betico ta forma un agrupacion di famia pa deleita famia, bisiña y amistadnan cu e tradicional paranda di fin di aña.

E rumannan, Betico, Efrain, Aiky, Hendrik, Rudy, Tommy hunto cu Srs. Janchi Werleman, Bibiano Lopez y Maiky Croes tawata reuni despues di tiro na cas di Francisco Croes pa djei pasa duna tur bisiña y familiares e bon

deseonan di aña nobo.

Acompaña pa tur e rumannan muher y nan respectivo casa-nan e paranda aki a haya e apoyo di "Kibra Stock" pa e cantidad di hendenan cu tawata sigui e paranda aki.

E parandanan aki tawata dura a veces 4 te 5 dia. Tambe tawata e custumber di Aiky hunto cu e grupo encabeza pa Betico, pa bishita hospital y pasa camber pa camber pa duna nos enfermeronan e saludo di aña nobo. E no ta un secreto cu e grupo tawata drenta hospital pa 2'or di atardi y ta sali bek for di hospital pa 10'or di anochi.


Aiky hunto cu Betico tawatin e custumber di subi pa Savaneta, Brazil y Sanicolas y pa despues ora cu mainta habri bin sigui cu e conocirnan den Santa Cruz.

Poco poco e sobrinonan ta caba nan estudio den exterior y e agrupacion ta haya miembronan nobo den persona di Ruben Werleman, Maikito Croes, Jonchito Croes, Rudney Lopez, Hilduard Croes y Goswin Oduber.

Sinembargo te cu e tempo ey ainda e agrupacion no tawatin un nomber fiho.

Aiky ta sigui conta cu e ta corda con un aña nobo atardi na aña 1973 cu e tawata hunto cu e grupo pa duna e saludo di aña nobo na su ruman muher Ada, ey mes pazuid di oficina di MEP na Santa Cruz. Aki Sr. Harry Croes ta presenta y despues di a scucha e dande di e grupo, Harry ta yama Betico bin tende cerca dje na auto. Aki Harry y Betico a hiba un combersacion basta extenso. Despues, Aiky ta sigui bisa, cu el a compronde for di Betico cu Harry mescos cu Betico tawata sumamente decepciona pa motibo cu e tradicionnan di mas dushi di pueblo di Aruba tawata a punto di desaparece, esta e Dande.

Nos tur por corda e famoso fiestanan di club despues di tiro. E bendita fiestanan ey a pone cu ningun hende ta worry mas pa pasa nan dande ya cu ta para toka y canta te cu nan campana



ta cay sin cu ningun hende na cas pa ricibi nan. Ya cu tur hende tawata na e fiestanan di club despues di tiro. Betico e aña nobo atardi ey a vocifera su preocupacion na Harry y Harry a priminti di bay haci algo na e problema ey. Betico a priminti Harry tur su cooperacion. En verdad e aña siguiente Harry Croes ta organiza e promer festival di dande cu a ser inaugura den Club Connie Francis na Santa Cruz. Un Connie Francis pata pata di hende cu a bin pa presencia e prome festival di Dande cu a conta tambe cu participacion di e conhunto Folklorico Arubano di Sr. Mo Tito Croes. E grupo den cual Aiky tawata pertenece a presenta cu nan uniform colorido y esey a duna e otro gruponan smaak pa e añanan siguiente nan tambe haci nan presentacion den un forma uniforma. Na e momentonan ey e agrupacion cu Aiky tawata forma parti di dje tawata den necesidad urgente di un nomber pa participa cune.

Espontaneamente tur hende a cuminsa yame "Betico y su Grupo" Hasta den reunion di presupuesto Sr. Watty Vos tawata desea Sr. Betico Croes exito cu su agrupacion na e festival di Dande e mes anochi encuestion.

Desde e inicio di e festival di dande, Aiky hunto cu e agrupacion tawata presenta na tur festivalnan cu excepcion di e aña cu Sr. Betico Croes a fayece y na un otro ocasion cu e agrupacion a keda descualifica pa motico cu nan a yega laat. E yegamento laat aki ta pa motibo di un otro compromiso cu e grupo tawatin. E tempo nan ey Betico y su grupo tawatin como cantante Sr. Aiky Croes y despues Sr. Maiky Croes y Janchi Werleman (q.e.p.d.) Segun e generacion nan nobo tawata crece, e cantidad di integrantenan di e conhunto tambe a sigui crece. Sr. Hilduard Croes, Maikito Croes, Ruben Werleman, Rudney Lopez y Gos Oduber a bira e integrantenan nobo di e agrupacion. Pa nos bin bek ariba Sr. Aiky Croes, mester menciona cu Aiky tawata e cantante di Dande pa



Feliz Pasco
y
Prospero Aña
2004



"Betico y su grupo". Aiky a canta pa promer biaha na Connie Francis Club, y despues tambe den terreno di feria na Santa Cruz, riba terreno di La Fama na Savaneta, Trappers Club y por ultimo na tres ocasion na Club Caiquetio na Paradera. Aiky ta sigui conta cu e tempo ey nunca "Betico y su grupo" tawata cay den premio pa motibo cu e grupo tawata uno spontaneo cu no tawata conoce mucho profesionalismo.

Despues di fayerimento di Betico e grupo a conoce un poco profesionalismo bou direccion di Sr. Hilduard Croes.

Tawata e momentonan ey tambe cu Sr. Maikito Croes a hasi su entrada como cantante fiho di Dande hunto cu su tata Sr. Maiky Croes. Akinan Aiky a pasa man atrobe pa su acostumbrado tambora cu ta e instrumento cu mas a facine den su juventud. Cu e agrupacion "Betico y su Grupo" cu despues di fayecimento di Betico a bira "Grupo di Betico", Aiky a bishita varios pais como integrante di e grupo.

Entre otro Aiky a bishita:

- Hulanda na 3 ocasion (Aruba dag, etc.)
- Alemania na 1 ocasion (Bolsa)
- Belgica na un ocasion (Bolsa)
- Cuba na 1 ocasion (Festival)
- Boneiro na 2 ocasion (dia di Rincon)
- Corsow na 1 ocasion (cultura)

Por ultimo Aiky kier a haci uso di e

oportunidad pa duna Sr. Harry Croes un fuerte abrazo di felicitacion hunto cu su famia cu e di 30 aña di festival di Dande. Tambe mester menciona e nomber di Sr. Mooi Geerman (q.e.p.d.) kende sin ningun interes tawata man drechi di Sr. Harry Croes durante hopi aña na e festivalnan aki.

Alavez Sr. Aiky Croes ta gradici Sr. Harry Croes y e comite organizador kendenan a corda riba loke Aiky a nifica pa tradicion di fin di aña esta e Dande. Na integrantenan di "Grupo di Betico" tambe ta bay palabranan di gradicimento pa motibo cu sin nan Aiky no por a logra yega asina lew. Na boso tur y mas cu tur na TODO PODEROSO masha danki, y laga nos bisa-

BIBA, BIBA BIBA Aña Nobo.

